

韓大中丞奏議

韓大中丞奏議

受業 崔光笏 編次

戈其遜

次孫泰 華敬錄

卷之十二

目錄

遵 旨查訊疏

提解交代銀欸疏



奏報起程疏

謝頒 聖訓疏

審擬崇義縣民李心适京控疏

遵 旨確查已革知縣貲財疏

訪獲假印人犯疏

請 旨革審疏

請將被控知縣解任疏

請將山場照舊封禁疏

提還生息錢文疏

已革知縣短交庫項疏

審明毒斃母命照例定擬疏

謝補授都察院左副都御史疏

請移建義倉疏

遵旨審明定擬疏

拏獲張貼揭帖恐嚇村民疏

勘定石圍山疏

籌議緝匪章程疏

附錄

列傳

墓誌銘

遵 旨查訊疏

奏為遵

旨查訊先將大概供情恭摺仰祈

聖鑒事竊臣於八月二十七日承准軍機大臣字寄
欽奉

上諭據步軍統領衙門奏江西崇義縣民李心适呈
控邱佑助挾嫌率眾將伊叔李官廉等鎗傷等情
已明降諭旨交韓文綺督同臬司鄭祖琛審訊矣

此案李心适所供有與李官廉同押班房之羅德明交出該縣班房押斃名單如果押斃一百餘名之多卽應嚴叅懲辦邱佑助等如果有惑衆斂錢窩藏匪類之事該縣何以不行查拏且邱佑助等業已被控何以聽其抗不到案迨李官廉等身受鎗傷赴案何以轉將伊等看押任令門丁差役詐索銀錢始予保釋着該撫提集人證秉公嚴查確訊據實具奏等因欽此臣查此案先據李心适族

叔李建陞赴都察院呈控咨解回江提到邱佑
助等委審未結訊據李建陞供認係伊主使李
心适赴京復控檢查李建陞前次控詞所稱押
斃一百餘命並未指有羅德明交給名單已飭
據該道府查稟該縣並無私設班房濫押斃命
之事臣以控關押斃多命且恐邱佑助等或實
有窩匪不法別情復遴委贛州府通判王友沂
前往密訪詳查並飭提羅德明等解質旋於十

月十九日准將李心适及原呈遞解到省接據
委員稟復訪查邱佑助等並無惑衆斂錢窩藏
匪類實迹取有地保鄉耆人等甘結至該原告
所呈押斃名單計一百十一名吊查各卷內有
命犯監斃及取保回家病故或於訊釋後外出
或現傳赴案共有三十餘名均非押斃餘尚逐
細確查先將羅德明等解省臣督同臬司鄭祖
琛訊據羅德明供無交給押斃名單邱佑助等

亦堅供並無惑衆斂錢窩藏匪類情事李官廉等僅認與唐滌光等互毆各受他物微傷惟李貴清李秀登被李運康點放竹銃致傷報縣驗明因案已稟府提訊分別交差看管飭醫旋因人證不齊保釋差役門丁並未索詐銀錢質之證見人等僉稱李建陞因爭奪墟場買賣致與邱佑助等結訟先自赴京呈控後又遣侄李心适續控各等供詰據李建陞又稱押斃名單係

張矮三交給供詞支吾臣查李建陞呈控該縣班房押斃一百餘名情節竄為緊要雖據查有三十餘名或存或故均非押斃其餘究竟有無其人曾否被押或有案據而姓名與原單互異必須澈底查明並一面飭提續據供出之張矮三與現訊人證確切嚴究該縣距省千餘里已飭委員飛速查提一俟質訊明確另行按例定擬合將查訊大概供情先行恭摺具

奏伏乞

皇上聖鑒奉

硃批虛心訊究務得確情慎防吏胥朦蔽

提解交代銀欸疏

奏為各屬交代案內銀欸均已提解完結循例具
奏仰祈

聖鑒事竊照州縣交代每屆年終例應將結報清楚
各案有無徵存欠解銀欸奏報一次今據兼署
布政司事按察使鄭祖琛詳稱查江西省道光
八年分詳咨各屬結報交代清楚共計四十三
案凡有冊造徵存未解銀欸俱經按數提解完

結並無存畱屬庫未解之項等情開單請

奏前來臣覆核無異除將送到交代清單咨部覆
核外理合恭摺具

奏伏乞

皇上聖鑒奉

硃批知道了

奏報起程疏

奏為恭報微臣交護撫篆起程日期並委臬司兼署藩司印務恭摺仰祈

聖鑒事竊臣於八年七月奏請

陞見欽奉

硃批着來見欽此嗣文武兩闡事竣因新任藩司富呢揚阿尚未到任復經臣附片

奏明請俟該司到後交護撫篆再行起程仰蒙

硃批知道了欽此茲藩司富呢揚阿業已抵任臣當
將地方情形及應辦事宜向富呢揚阿詳晰告
知所有緊要各件分別趕辦完竣於九年正月
初五日將江西巡撫關防同

王命旗牌等項委員齎交該司富呢揚阿暫行護理
至藩司印務臬司鄭祖琛才識明敏政事精詳
前委兼署藩篆辦理妥協堪以仍委兼署除檄
飭遵照外臣卽於初八日起程趨赴

闕廷跪聆

恩訓理合恭摺具

奏伏乞

皇上聖鑒奉

硃批知道了

謝頒 聖訓疏

奏為恭謝

天恩事竊臣抵京後據駐京提塘官捧到

欽頒

仁宗睿皇帝

聖訓一部當卽叩頭祇領欽惟我

皇上道承

統緒

治協光華稽

先聖之典章文昭經緯仰

一人之繼述

慕切羹牆洪惟

仁宗睿皇帝德敷四海

恩溥八埏

宏燾載以宜民

作君師而覺世

綸言煥發婉三謨二典之隆

彞訓昭垂括千聖百王之蘊

大經大法文明普被於寰瀛

丕顯丕承

紹衣勤思於夙夜克修

典則積百十卷以編纂敬繹

箴規徵億萬年之法守臣職膺疆寄識昧管窺蒙

寶籙之

寵頒美矣麟麟炳炳

神樞之廣運大哉

蕩蕩巍巍

弁言著

優渥之誠監

成憲而彌勤

乙覽

誥誠凜法廉之義拜

洪施而益勵寅恭所有臣感激下忱謹繕摺恭謝
天恩伏乞
皇上聖鑒

審擬崇義縣民李心适京控疏

奏為遵

旨審擬具奏仰祈

聖鑒事竊臣承准軍機大臣字寄道光八年八月十

六日奉

上諭據步軍統領衙門奏江西崇義縣民李心适呈
控邱佑助挾嫌率衆將伊叔李官廉等鎗傷等情
已明降諭旨交韓文綺督同臬司鄭祖琛審訊矣

此案李心适所供有與李官廉同押班房之羅德明交出該縣班房押斃名單如果押斃一百餘名之多卽應嚴叅懲辦邱祐助等如果有惑衆斂錢窩藏匪類之事該縣何以不行查拏且邱佑助等業已被控何以聽其抗不到案迨李官廉等身受鎗傷赴案何以轉將伊等看押任令門丁差役詐索銀錢始予保釋着該撫提集人證秉公嚴查確訊據實具奏等因欽此並經步軍統領衙門奏奉

上諭此案著交韓文綺督同臬司鄭祖琛提集人證
卷宗嚴審按律定擬具奏原告李心适該部照例
解往備質欽此旋將李心适遞解到江臣遵提集
督審將所訊大概供情及先後委查緣由

奏奉

硃批虛心訊究務得確情慎防吏胥朦蔽欽此時臣
已交卸北上當於途次恭錄移知護撫臣富呢
揚阿欽遵辦理嗣據委員等稟復查李建陞呈

出押斃名單係一百十一名續奉行查李心造
黏呈之單內除重寫四名計一百十四名茲復
逐一查點其曾經有案者共四十三名內命犯
監斃三名餘於保釋後或患病身故或現存在
家或因事外出各有保狀可憑此外七十一名
查無案據細加訪察實無押斃多命等情並委
據南昌府李本榆等訊供由司解審前來適臣
回任隨提齊人證督同臬司鄭祖琛隔別研訊

緣李建陞之祖李子禧等於雍正二年將坐落
上堡地方糧田蓋造房屋設立永興墟市嘉慶
十三年有吳作禮等與生員邱佑助堂兄邱佑
慶呈明縣府在相距永興墟三里地方合村公
設真和新墟相安多年後因真和生意較盛於
永興李建陞心懷不平道光五年正月李建陞
雇採茶戲班在墟酬神邱祐助等恐致匪徒乘
機剪竊稟縣示禁嗣李建陞等路遇向斥爭鬧

將邱祐助等毆傷控縣訊因爭墟起衅斷令買賣聽從民便並將李建陞等責懲李建陞呈控司道批府提訊仍照縣斷詳結邱佑助與真和墟首事人等具帖通知商民赴墟貿易李建陞恐被攔奪生意控府委勘兩無妨礙完案六年三月十九日李建陞與李貴清等路遇向在永興墟生理之唐隆光等改赴真和墟貿易斥責互毆李貴清用竹挑將唐隆光等戳傷唐隆光

奪挑亦將李貴清並李官廉李秀登等戳傷逃走李貴清李秀登追毆時唐隆光隣人李運康攜帶竹銃打崔經過攔勸被斥順點竹銃嚇放致砂子中傷李貴清右額角李秀登左手肱脰控經該縣蔣叙倫驗傷稟府提審當將李官廉等交差宋貴等在寓看管醫治李建陞懇宋貴等給領不允吵鬧經劉組勸散旋因人證未齊將李官廉等取保李官廉等謝給宋貴等飯食

洋銀三圓李建陞控經臬司暨臣批行訊究屢傳要證未到致未訊結李建陞因永興墟生意稀少總由添設真和新墟所致起意赴京呈控冀圖革除新墟憶及真和墟旁邱佑助為首公建許真人廟宇常有乞丐棲宿指為邱佑助等惑眾斂錢窩藏匪類並因李貴清等被李運康銳傷未見獲辦轉交差役看管卽指為該縣聽囑斃押並牽砌押斃多命各情做就呈詞封章

赴都察院衙門呈遞訊供當令自行開拆封章
核與原呈無異咨解回江提省委審追問押斃
多命確據李建陞無可指證因羅德明先曾談
及張週庭因案避匿被差屢傳懷恨開有押斃
百餘人名單欲控經張矮三勸止將單收存之
事卽藉查對名姓為詞令李官廉向借原單值
張矮三外出經其妻周氏借給李建陞因李官
廉等謝給差役飯食洋錢先未指控又因委員

詣勘時李心達失足跌傷候聞被邱佑助等圍毆邱佑助等尚未提到疑為抗延起意遣人赴京續控並知張週庭故後曾經其妻黃氏妄控押斃訊結有案將張週庭之名添入押斃單內仍照原情添砌丁役詐贓及邱佑助等當官圍殺抗不到案並黏張週庭捏寫押斃名單砌詞逼令族姪李心造赴步軍統領衙門呈控奏奉諭旨解回訊悉前情臣以李建陞所控該縣班房押

斃百餘命一節最關緊要其黏呈名單原詞稱
係羅德明交給迨提羅德明質訊改稱得自張
矮三今張矮三又稱係張週庭捏寫欲控經伊
勸止被李官廉取去恐係張矮三等飾詞諉卸
並恐該縣或實有私設班房押斃多命吏胥串
囑消弭情事再三嚴詰不特各供僉同卽質之
李建陞呈控被押多年指以作證之曾珠光等
亦堅供並無被押之事且有控被押斃現據到

案之劉東海等活口可證似非串飾查李建陞所呈押斃名單並非自行捏造亦不知張週庭假捏意止取以作證尚非有心誣告其控烏鎗傷人丁役詐贓等款數事罪等今丁役詐贓各情雖經審虛均出有因李貴清等被銃致傷業已得實律得免罪惟呈遞封章控訴挾制自應照例問擬李建陞合依控訴事件呈遞封章挾制入奏如所告得實係平民照衝突儀仗妄行

奏訴加一等例發邊遠充軍李運康銃傷李貴
清李秀登業已平復合依因事爭鬪擅將竹銃
施放傷人例發雲貴兩廣烟瘴少輕地方充軍
仍照名例以極邊四千里為限生員邱佑助訊
無惑衆斂錢窩藏匪類情事取有保隣人等甘
結第爭墟滋事卽屬不守卧碑應斥革衣頂照
不應重律杖八十張矮三旣知張週庭捏造押
斃名單欲控雖經勸止並不卽時銷燬仍存家

內致肇訟端縣差宋貴石松得受李官廉等飯
食洋銀三圓雖非索詐均屬不合應與聽從借
取押斃名單之李官廉隨同滋訟之李心達及
並不查明率聽抱呈之李心适俱各照不應重
律杖八十李貴清與唐隆光用竹挑互傷應各
照他物毆人成傷律笞四十事犯到官在道光
八年十一月初九日

恩詔以前李建陞呈遞封章李運康火器傷人均不

准援減李建陞據供孀婦獨子李運康據供親
老丁單應確查是否屬實再行分別辦理其餘
杖笞各罪均予援免邱佑助仍革衣頂宋貴石
松仍革役李同亨等訊屬無干應免置議宋貴
等所得洋銀照追入官永興真和兩墟定以每
旬二五八日為開市日期按次輪開如遇歲時
佳節通融貿易不得攔阻以杜後衅崇義縣知
縣蔣叙倫並無聽囑延案及私設班房押斃多

命之事惟於李官廉等受傷報驗並不拘犯取
辜遽行交差看管亦有不合相應附叅聽候部
議除將全案供招咨部外理合恭摺具

奏伏乞

皇上聖鑒勅部核覆施行奉

硃批刑部議奏

遵 旨確查已革知縣貲財疏

奏為遵

旨確查已革知縣蕭夢蘭原籍資財恭摺仰祈

聖鑒事竊臣於四月初一日承准軍機大臣字寄道光九年三月十九日奉

上諭前據琦善奏叅山東前任壽張縣丁憂知縣蕭夢蘭虧缺正項銀九千餘兩當經降旨交該府尹等將該革員寓所及原籍資產查封備抵茲據盧

蔭溥等查明蕭夢蘭係祖籍江西高安縣寄籍大興現在家屬俱在山東京中並無親族房產著琦善韓文綺即將該革員寓所及江西原籍有無資財隱寄再行確查備抵將此諭令知之欽此欽遵當與藩司富呢揚阿臬司鄭祖琛密委因公在省之署廣信府通判清江縣知縣張湄馳往會同該府縣嚴密確查茲據該委員等具稟該革員蕭夢蘭祖居三十五都一圖地方遵卽密赴

該處查有該革員蕭夢蘭之父蕭元壽獨自在籍別無家屬當將屋門封閉詳細檢查所有衣物均屬破舊同當票逐一登記封貯訊據蕭元壽供稱寄籍大興家屬俱在山東伊於道光八年因子虧空回籍設措奈無處告貸在家逗遛原籍止存祖遺土磚房屋四間地三分均無契據又自置田二十一畝契在山東價銀若干記不清楚此外別無資財及隱匿寄頓情事傳訊

族隣人等僉供無異隨將房地田畝及衣物約
估共值銀二百餘兩由司核詳前來除飛咨山
東撫臣飭追田契咨江同房地衣物當票等項
確實估計造冊並此外有無隱寄訊取供結另
行咨部外所有遵

旨確查緣由理合恭摺具

奏伏乞

皇上聖鑒奉

硃批知道了

訪獲假印人犯疏

奏為假印冒領庫銀犯賊全獲按例審擬仰祈
聖鑒事竊據臬司鄭祖琛於兼署藩司任內稟據長
寧縣具文請領養廉銀兩當經放給旋即查出
假印形跡訪係熊論言冒領飭拏將書吏人等
押發嚴究並據南新二縣訪同前由差拏潛匿
等情經前護撫臣富呢揚阿暨臣先後札飭嚴
拏據犯母熊黃氏繳贓呈首遣人指引差役將

犯拏獲並獲夥犯徐友勝等委員訊明由司解
勘前來臣隨督同藩臬兩司逐一研審緣熊論
言籍隸南昌縣訓蒙度日有母舅黃家璧充當
藩司書吏道光八年熊論言失館閑居經黃家
璧雇令進署幫寫文冊旋因懶惰逐回十二月
間熊論言貧苦難度憶及在藩署時曾見檔案
有長寧縣未領廉銀適有攜回拆存長寧縣公
文廢封起意照刻假印冒領稔知漆匠徐友勝

素善刻字誑稱長寧縣託伊代領養廉因封套
破損懇徐友勝仿照廢封印信雕刻假印以便
換封盖用投遞許給工銀四兩徐友勝貪利允
從卽用木塊雕成交給熊論言捏造長寧縣文
領混填差役徐升之名盖用假印因自往投文
恐人認識復向素識之劉時松誑稱長寧縣差
徐升來省領銀患病難行央允劉時松頂名代
領送給錢二千文劉時松隨赴藩署投文請領

該署司核扣司庫墊欸外應給銀四百二十三兩零照例搭放制錢九十六千零於十二月二十三日劄庫放給熊論言將領出制錢運赴婁宏宗錢店換銀九十兩當給徐友勝工銀四兩劉時松心疑盤詰熊論言料難隱瞞告知實情囑勿聲張分給銀六十兩熊論言自花用銀二十餘兩原領庫銀託言他人寄存交伊母熊黃氏收藏並將假印燒燬經該署司查出文領內

印信與該縣另文印信篆形稍異訪係熊論言
冒領飭縣拏究並先經南昌縣等訪拏熊論言
聞風畏懼向伊母據實告知逃往湖南攸縣妻
父黃夫伸店內熊黃氏恐子問重罪代為呈首
全繳賊銀指出換錢之店如數追起並據遣人
隨同差役將熊論言獲解來江續獲徐友勝等
審供不諱臣以熊論言先在藩署科房幫寫文
冊自必串同該吏黃家璧冒領且徐友勝僅得

些微謝資何肯代雕假印劉時松始則冒差投
文領銀事後又復分贓顯俱知情同謀並恐此
外尚有假冒別案再三研究熊論言堅供實止
獨自假冒這一次如果黃家璧等知情串領焉
有不將全贓俵分之理委無扶捏別情詰訊黃
家璧等僉供不移似無遁飾查例載偽造諸衙
門印信冒支錢糧者擬斬立決又偽造假印之
案僅受些微價值代為私雕並無同謀分贓情

事以起意之人為首雕刻之人為從又聞挈投
首之犯俱於本罪上減一等各等語此案熊論
言起意私雕假印捏造文領冒領養廉按例應
擬斬決係伊母代首律得如罪人自首法且賊
已全獲亦與賠償准首之律相符應照例於死
罪上減一等杖一百流三千里徐友勝聽從代
雕假印僅受些微價值並無同謀分贓情事應
照為從減首犯罪一等例杖一百流三千里劉

時松訊止事後知情分贓應照知人強竊盜後而分贓者計所分贓准竊盜為從論竊盜贓六十兩為從減一等律杖六十徒一年免刺分別解配折責安置書吏黃家璧雖訊非同謀串領惟雇令匪徒進署幫寫文冊致滋事端應照不應重律杖八十折責草役婁宏宗黃天伸均訊不知情應免置議原領銀錢全數起獲歸還藩庫婁宏宗換給銀兩仍於熊論言等名下追給

假印已據銷毀無從查起此案匪徒假印冒領
該署司鄭祖琛未能先事覺察例有處分惟係
自行查出獲犯究辦相應聲明聽候部議除將
全案供招咨部外理合恭摺具

奏伏乞

皇上聖鑒勅部核覆施行奉

硃批刑部議奏

遵 旨革審疏

奏為捐納中書科中書被控毆斃人命請

旨革審仰祈

聖鑒事竊據奉新縣孀婦余劉氏遣夫弟余紹敏以
伊夫余紹寬自省回家路經新建縣地方被鄧
賢忠糾衆喝毆致斃鄧和之勾賄故出等情赴
都察院呈控奏奉

諭旨交臣督訊定擬具奏等因欽此並准將抱告余

紹敏遞解到江臣查鄧賢忠係捐納中書科中書余紹寬被傷身死一案先據新建縣霍樹清驗訊道光五年十一月初九日夜余紹寬患瘋走失被鄧興才等緝縛經鄧世信等勸釋曾被熊德垣用烟袋頭毆傷右額角余紹寬後又走入鄧啟瑞店樓被鄧賢忠等疑賊喊捕跑走不知被何人毆斃等情詳請緝兇經臣查核供情支離批司飭訊屍妻余劉氏赴司暨臣衙門指

控鄧賢忠等正兇復飭確究因人證未齊致未
訊詳迨初二叅限滿先後詳經咨叅旋據該縣
訪聞余紹寬係被鄧賢忠與工人周金盛等共
毆致斃鄧賢忠訊不承認周金盛等逃逸差掣
在案嗣提到人卷並掣獲周金盛解省委員訊
據周金盛供鄧賢忠屋旁有族人鄧啟瑞空閑
店屋那夜聽聞犬吠出看見店門已開余紹寬
潛匿店樓經伊拉下先被鄧賢忠朱駝子毆傷

伊亦擔毆右脇等處逾時身死等供鄧賢忠供
止誤毆左臂肱肱忽認忽翻飭挈朱駝子及被
控行賄之鄧和之未獲在場見毆要證帥先增
等亦俱外出無憑質定周金盛旋因患病身故
鄧和之自行投案訊據堅供並無賄囑情事茲
傳到帥先增鄧世興等供與周金盛原供大畧
相同提訊鄧賢忠供詞仍復游移質之屍弟余
紹敏等雖無可指證惟稱余紹寬向無瘋病聞

先因賭博後被鄧賢忠喝令毆斃各執一詞臣
查鄧賢忠如果實無喝毆及起衅別情何致余
紹敏等嘵嘵不服今鄧賢忠不特供未喝令卽
認毆左臂肱肱之傷亦甚閃爍顯係特符狡展
且證佐人等俱係鄧賢忠族隣更難保無賄串
避就情事相應請

旨將鄧賢忠中書科中書斥革以便澈底確切嚴審
究辦為此恭摺具

奏伏乞

皇上聖鑒訓示奉

硃批務要嚴行審訊按律定擬具奏另有旨內閣奉
上諭韓文綺奏捐納中書科中書被控毆斃人命請
革職審訊一摺此案鄧賢忠被控糾衆喝毆余紹
寬斃命據屍弟余紹敏所供衅起賭博與該縣原
詳余紹寬因瘋走失鄧賢忠疑賊喊捕情節不符
現在鄧賢忠供詞狡展忽認忽翻一切證佐人等

俱係該犯族隣難保無賄串避就情事必須澈底
根究以成信讞捐納中書科中書鄧賢忠着卽行
斥革交該撫親提嚴行審訊按律定擬具奏不准
稍有枉縱該部知道

請將被控知縣解任疏

奏為被控知縣請

旨解任質審仰祈

聖鑒事竊臣於四月十一日接准都察院咨據崇義

縣民人陳有端遣抱告陳鴻化以陳有玠等私

設鐵廠挾嫌搶劫該縣因得受規禮彌縫不辦

並因陳慶得被陳慶雯等致死命案誣伊正兇

聳縣帶役圍拏焚燬房屋致將陳有祿燒斃差

役郭洪等強姦婦女等情呈控具奏二月十一

日奉

旨此案着交富呢揚阿鄭祖琛親提人證卷宗秉公
嚴審按律定擬具奏抱告陳鴻化該部照例解往
備質欽此並准將抱告陳鴻化遞解到江時臣先
已自京回任遵卽行司飭提人卷來省伏查此
案先據崇義縣蔣敘倫驗訊陳慶得被傷身死
兇犯逃逸詳請通緝並據陳有端赴臣衙門呈

控陳有玠等挾仇焚搶批司飭府督拏詳辦旋據該縣報獲陳有祿等解郡會同委員大庾縣訊因聽從陳聲皓邀同往向陳慶得索欠爭鬧與陳有端等亂毆致死錄供通詳陳有祿旋在大庾縣監患病提禁身故陳有端復控經督臣發道提審遞回贛縣在監病斃均據先後驗報在案臣隨督同藩司富呢揚阿臬司鄭祖琛提訊陳鴻化供與控詞無異據陳有玠供向賣鐵

鍋生理俱係收買廢鐵鑄造並非私鐵亦無規
禮送縣係被陳有端等搶鐵妄控伊姪陳慶得
被陳有端等致傷身死脫逃報縣帶役往拏陳
有祿等放鎗恐嚇失火燒屋委非串差焚劫縣
差李瀧等亦堅供並無焚掠及與郭洪姦污婦
女情事質之案犯陳仁化陳朋化等僉供陳有
祿等因陳慶得命案聽聞陳有玠等多人來聲
嚇放空鎗陳有玠等亦放鎗抵禦致火散落草

堆延燒房屋經縣率同差役將伊等同婦女人等一並帶縣審訊後將婦女釋回等供臣以陳有玠等有無設厰鎔鑄私鐵陳有端等被焚房屋幾間是否自行失火延燒抑被陳有玠等串差焚燬必須勘查明確業已遴委南昌府同知霍樹清前往履勘密查其被控強姦婦女之差役郭洪並所指致死陳慶得之陳慶雯及起衅爭毆之陳聲皓等同案內要證俱未解到催飭

拘傳送案以憑澈底究辦查現訊原被人等各
供參差均難憑信惟該縣蔣敘倫督拏命案逃
犯何以率將婦女帶訊致多滋擾且被控得受
私鐵規禮虛實尤當嚴究該縣先經委署贛縣
自應解任質訊據藩臬兩司會詳前來相應請
旨將署贛縣事崇義縣知縣蔣敘倫解任以便提同
質訊辦理除委員接署查明倉庫錢糧有無未
完另行核辦外謹會同大學士兩江督臣蔣攸

銛合詞恭摺具

奏伏乞

皇上聖鑒訓示內閣奉

上諭韓文綺奏被控知縣請解任質審一摺江西署
贛縣事崇義縣知縣蔣敘倫督率命案逃犯率將
婦女帶訊致多滋擾且被控得受私鐵規禮虛實
尤當嚴究蔣敘倫着解任交該撫提同全案人證
秉公質訊按律定擬具奏

請將山場照舊封禁疏

奏為山場間有鉛苗業經勘明照舊封禁先行據
實覆

奏事竊臣於八月初八日承准軍機大臣字寄七
月二十六日奉

上諭御史王贈芳奏江西宜春縣石圍山間有銅鉛
砂苗奸民妄思開採前經封禁今聞有上高縣生
員陳泰來於上年八月赴提督衙門具呈開礦批

咨江西巡撫查覆陳泰來回至江省輒敢以京控批准為名議定股分開採銀礦各府屬有受其愚弄捐資入股者自數百兩至數千兩等語奸民牟利惑衆最為地方之害該縣石圍山本經封禁豈可任其復行開採着蔣攸銑韓文綺迅飭該府縣嚴查禁止陳泰來赴京具呈指稱批准是否實有其事並現在曾否聚衆開挖着查明據實具奏至該御史奏稱萍鄉縣有葉絲沖山亦有礦苗着一

併飭為嚴切查禁勿許偷採等因欽此臣查袁州府屬宜春縣石圍登佈裡山在郡城之西北距城一百里該山有譚肇賢原買之一嶂賣與林森經上高縣生員陳泰來給錢合管前於嘉慶二十五年道光元年據譚肇賢林森等先後以該山產有鉛苗呈請開採均經勘明封禁並設卡派兵巡查道光七年陳泰來呈經督臣咨臣復飭勘禁陳泰來又於上年赴提督衙門呈請

試採咨交勘明辦理臣以該山歷經封禁乃陳
泰來屢呈不休若非確切勘查嚴申例禁不足
以絕其覬覦之心且恐有勾引偷採情事行據
兩司詳委饒州府知府方傳穆南昌府同知霍
樹清會同該府縣逐一履勘旋據詳稱該山遍
植樹木並無鉛礦透露亦無私挖形跡試驗間
有鉛砂並不暢旺且山之附近多有居民房屋
田畝例本不准報採當經遍加曉示請將該山

並毘連之松樹壁等山概行封禁等情臣復嚴飭一體示禁並以前定巡防章程如何再加周密永垂久遠正飭兩司妥議核辦間欽奉

諭旨查禁遵卽敬謹轉行並飭提訊陳泰來如果指稱京控批准議定股分牟利惑衆必當澈底究辦一面飭將萍鄉縣之葉絲沖山嚴切查禁勿許偷採除俟查訊明確並酌議巡防事宜會同督臣另行定擬具

奏外合將登佈裡山照舊封禁現在並無聚衆開
挖緣由先行據實奏

聞伏乞

皇上聖鑒奉

硃批知道了

提還生息錢文疏

奏為錢局原借司庫錢文生息津貼期滿提還歸

款奏祈

聖鑒事竊照江西寶昌局爐頭匠役額支工料錢文
不敷當經前撫臣瑞 籌請動借司庫錢三萬
串發商按月一分生息每年以二千串津貼不
敷工料以一千六百串作本逐年遞加生息俟
八年後提還原借司庫錢三萬串計可餘息錢

一萬九千六百七十九串零永遠生息以供津貼等情奏奉

硃批依議欽此欽遵嗣因每年津貼錢二千串尚屬不敷復捐添錢四百串以資辦公在案今據署藩司富呢揚阿鹽法道齊嘉紹會詳稱寶昌局前借司庫錢文以道光元年三月初八日發商生息起扣至九年三月初八日八年期滿當將所借錢三萬串提歸司庫所有息錢除按年按

卯津貼外原奏餘息一萬九千六百七十九串
零之數未曾核算閏月今併計共存息錢二萬
二百二十一串零應請仍照原議將此項錢文
作本交商每年可生息錢二千四百二十六串
零以二千四百串津貼不敷工料遇閏一律增
給尚餘錢二十六串零解司充公仍飭將各商
領結送查並責成南昌府同知按月收取不致
延欠將收放數目按年造冊報銷並將捐添之

錢停止等情請

奏前來臣查寶昌局原借司庫發商生息錢三萬串屆值八年期滿業經提還歸欵所有息錢仍作本生息每年以二千四百串津貼爐匠遇閏增給餘錢解司充公該錢局得此調劑則工料無虞竭屢經費可計久長於辦公洵有裨益除飭局員實力經理並咨部外理合恭摺具奏伏乞

皇上聖鑒奉

硃批戶部知道

已革知縣短交庫項疏

奏為已革擬徒知縣短交庫項審明定擬恭摺具
奏仰祈

聖鑒事竊照前任興國縣知縣陸以濟於候際清贖

罪舞弊案内奉

旨解京歸案質訊問擬滿徒發配順天通州安置因
交代未清咨提來江核筭陸以濟短交地丁捐
雜各欸共銀九千八百八兩零據該管府道由



司揭報經臣咨部先行拏問一面飭司查抄省
寓資財暨咨浙江撫臣查封該革員原籍家產
覆江備抵並飭提丁胥人等來省訊係由水路
起解錢糧在贛縣天柱灘地方遭風壞船沉失
銀兩挪欸補解等語是否屬實必須行查勘訊
咨部展限在案茲據署贛縣知縣蔣敘倫勘明
該縣天柱灘地方險要平時灘高溜急如遇狂
風暴雨人力難施道光四年三月初間興國縣

起解錢糧至被遭風壞船有漁戶郭二仔撈救
傳訊屬實錄供繪圖申復又據興國縣知縣程
儒林申稱陸以濟實短交徵存二三四等年地
丁銀四千八百七兩七錢零其餘欠交銀三千
三百一兩三錢零並接前任甄別已故知縣夏
璜漏交銀一千六百九十八兩九錢零共銀五
千兩零均係本省捐攤雜款係歷任入於交代
案內流交並無應行解部之項經書賴恒榮久

已病故將其餘應訊書差人等解省委員訊擬
由藩臬兩司解審前來臣親提研鞫緣陸以濟
祖籍浙江桐鄉縣寄籍烏程縣由監生捐納知
縣選授江西興國縣知縣於道光三年九月到
任四年三月初五日陸以濟將徵存三年地丁
正耗銀四千六百一十五兩四錢零元年地丁
正耗銀二千一百七十三兩二共銀六千七百
八十八兩四錢零分批專差家丁左福銀匠羅

升差役鍾貴古亮管解陸以濟因圖省便雇船
由水路解赴藩庫投兌初七日行抵贛縣所轄
之天柱灘陡遇狂風暴雨灣泊不及將船碰翻
人銀落水經漁戶郭二仔將人救起銀兩沉溺
鍾貴等趕回報知陸以濟親詣勘明雇人撈獲
銀一千九百兩餘銀四千八百八十八兩四錢
零水漲湍急沖失無獲陸以濟當以水路解銀
係屬違例遭風沉失總須賠補未經具報旋因

催解緊急先後挪移徵存二三四等年地丁銀
四千八百七兩七錢零又自湊銀八十兩六錢
零賠解原冀陸續彌補閏七月內因候際清案
卸事解京未及補苴經接任知縣程儒林查出
詳經咨提陸以濟解江筭明揭報咨部掣問研
訊各供前情不諱臣以陸以濟所供起解錢糧
遭風壞船沉失銀兩並未詳報焉知非侵欺入
已捏詞掩飾嚴加究詰矢口不移查該贛縣送

到訊取撈救之漁戶郭二仔供結與各供吻合
案無遁飾查例載挪移庫銀五千兩以下者仍
照律擬雜犯流總徒四年又律載二罪俱發以
重者論各等語此案陸以濟前在興國縣任內
欠交歷任入於交代案內及已故前任夏璜漏
交捐雜款項共銀五千兩零例不計罪現經查
訊明確均係本省捐雜之款陸以濟既無力完
繳自未便與正項錢糧一律查辦應請於本省

另籌歸補以清欸項所有陸以濟挪移庫銀四千八百七兩七錢零除查封寓所衣物估變及追繳所當衣物餘銀共四兩二錢零備抵外寔未完銀四千八百三兩零按例應擬總徒其因候際清贖罪舞弊案內先行解任解京審擬滿徒甫經發配卽咨提來江審辦自應歸於此案從重問擬陸以濟合依挪移庫銀五千兩以下仍照律擬雜犯流總徒四年例總徒四年雖事

犯在道光八年十一月初九日

恩詔以前不准援減照例監追俟年限滿日有無完
繳分別辦理庫書郭才光戶書陳彩廷賴恒榮
於本官挪移庫項並不稟阻應各照不應重律
杖八十事在

赦前應請援免仍革役賴恒榮業已病故應毋庸議
家丁左福差役鍾貴古亮押解銀兩遭風沉失
並無典守不慎均免置議陸以濟寓所資財當

經查封變抵並准原籍浙江查明陸以濟止有
公共房屋什物別無資財產業及隱寄情事取
結咨覆仍咨浙江將陸以濟應分公共房屋什
物變抵另報除供招咨部外理合恭摺具

奏伏乞

皇上聖鑒勅部核覆施行奉

硃批刑部議奏

審明毒斃母命照例定擬疏

奏為被逼取砒致母服毒斃命審明照例定擬恭
摺具

奏仰祈

聖鑒事竊照南城縣民饒錦盛以伊母劉氏被族人
饒錦玉毆傷額顙等處身死報經該縣張玕驗
明劉氏額顙左眼胞各有磕傷牙根青色口開
用銀針探入取出青黑色兩手心等處均青色

係受傷後服毒身死核與報呈不符拘集人證
究出劉氏因向饒錦玉借欠該族公項錢文未
還被索爭鬧失跌磕傷該氏抱忿起意服毒圖
詐逼令伊子饒錦盛取砒自行吞服身死等情
由府審明因案情重大將犯證卷宗押解來省
委據南昌府督審定擬由臬司解勘前來臣親
提犯證研鞫緣饒錦盛係劉氏次子其父早故
與兄饒錦幅分居劉氏向同饒錦盛居住與族

人饒錦玉昆隣本年七月間饒錦玉等因合族
祖墳坍塌商議將公存祭田一段賣錢五十二
千文擇日修墳劉氏因貧苦難度向饒錦玉於
公項內暫借錢十二千文應用屢討未還八月
十二日上午饒錦盛出外工作劉氏赴饒錦玉
家閑坐饒錦玉索討前欠劉氏以錢係公項不
應逼索饒錦玉斥責賴債稱欲稟官究追劉氏
吵鬧趕毆失跌磕傷額顱左眼胞經饒錦成勸

散劉氏哭泣走回忿恨莫釋迨饒錦盛回家告
知前情並稱藏有毒鼠砒末一包伊已年老無
用不如服毒往饒錦玉家自盡圖詐可以得錢
棺殮免還欠項逼令饒錦盛尋取砒末饒錦盛
向勸劉氏聲言如不允從卽行撞死饒錦盛被
逼無奈尋出砒末交給冀圖暫順母意再行勸
阻詎劉氏接砒開看當卽吞入口內順取桌上
冷茶送服饒錦盛攔阻不及劉氏卽趕往饒錦

王家維時饒錦玉與妻鎖門外出探親不能進
去經饒錦盛勸回劉氏毒發嘔吐不止適饒錦
盛之嫂鄔氏路過進看查問劉氏告知自行起
意服毒逼令取砒緣由經饒錦盛與鄔氏將劉
氏扶至床上一同灌救無效至十三日早殞命
鄔氏哭泣饒錦盛因伊母原欲向饒錦玉賴欠
訛詐服毒身死嚇禁鄔氏不許聲張卽捏稱伊
母被饒錦玉毆死投保報縣經縣驗明究出前

情解省審供不諱詰無從旁聳恿調藥加功情
事查饒錦盛因母劉氏借欠不還被饒錦玉片
責失跌抱忿起意服毒詐賴該犯向勸不允被
逼無奈取砒交給原冀暫順母意再行勸阻不
期劉氏卽時吞服以致毒發斃命尚非有心致
死其母惟倫紀攸關自應照律問擬饒錦盛合
依謀殺母已死者凌遲處死律凌遲處死請
旨定奪饒錦玉並無毆打情事第索欠口角致釀人

命地保李顯失於查察隨同混報均照不應重
律杖八十各折責發落饒錦幅先期外出並不
知伊母毒斃情事後經查知卽行赴縣供明應
與灌救不及後被嚇禁聲張之鄔氏均免置議
劉氏所借田價身死勿徵除供招咨部外合將
審擬緣由恭摺具

奏伏乞

皇上聖鑒勅部議覆施行奉

硃批刑部速議具奏

謝補授都察院左副都御史疏

奏為恭謝

天恩仰祈

聖鑒事竊臣承准軍機大臣字寄欽奉

上諭岳良前經補授江西布政使本日已有旨將吳光悅補授江西巡撫韓文綺補授都察院左副都御史現在吳光悅由京赴任尚需時日岳良接奉此旨着迅速前赴新任護理江西巡撫篆務韓文

綺侯岳良抵任接印後再行來京供職等因欽此

伏念臣受

恩深重疊任封圻方以叢積愆尤彌滋悚懼茲復奉命補授都察院左副都御史荷

生成之逾格實欽感以難名臣惟有益矢奮勤勉竭心力以冀近承

訓諭稍報涓埃現將經手事件趕緊清理一俟岳良到江接護巡撫篆務臣卽起程北上所有微臣

感悚下忱理合繕摺恭謝

天恩伏乞

皇上聖鑒

請移建義倉疏

奏為省城義倉穀石買有成數議請移建採買恭
摺仰祈

聖訓事竊照江西省城建設義倉每年於鹽務公費
項下動支銀八千兩按照時價買穀貯倉先經
奏蒙

恩准逐年採買

奏報在案查自道光五年起及本年應買共已貯

穀四萬一千餘石自應酌籌分貯各郡以廣儲
備飭據藩臬兩司鹽道會議詳稱江西十四府
州內贛州距省較遠所屬一廳八縣地方遼濶
戶口殷繁山多田少民鮮蓋藏應請照每年收
買之數先於贛郡建倉買貯次及他郡以期周
徧移准贛南道轉據該府縣議請建倉十六間
可貯穀二萬餘石建倉公費及置備什物共估
需銀二千六百兩並於鹽務充公項下動支等

情詳請具

奏前來臣查義倉之設原為先事籌備贛郡產穀
本少生齒日繁郡城向有關義倉貯穀無多今
此項義穀應卽自道光十年為始移至贛郡採
買先建倉廩所需工費卽於鹽務公費項下動
給責成贛南道督飭贛縣妥辦每年於秋收後
領銀買穀一切收放各事宜均照省倉章程辦
理仍令藩司鹽道隨時稽查於核銷鹽務公費

案內由撫臣按年

奏報俟贛郡買足三年再於他郡酌量次第照辦

庶公項不至虛糜

皇仁益昭普被似於通省積貯大有裨益是否有當

理合恭摺具

奏伏乞

皇上聖鑒訓示遵行奉

上諭韓文綺奏省倉穀石買有成數請移建採買一

摺江西省城建設義倉每年於鹽務公費項下支銀八千兩按照時價買穀貯倉據該撫查明自道光五年起至本年共已貯穀四萬一千餘石請分貯各郡先於贛州府建倉買貯次及他郡以期周徧着照所請所有此項義穀准其自道光十年為始移至贛郡採買先建倉廩所需工價銀二千六百兩着於鹽務公費項下動給責成贛南道督飭贛縣妥辦每年於秋收後領銀買穀一切收放各

事宜均着照省倉章程辦理該撫仍飭藩司鹽道
隨時稽查於覈銷鹽務公費案內由該撫按年奏
報俟贛郡買足三年再於他郡酌量次第照辦以
資積貯該部知道

遵 旨審明定擬疏

奏為遵

旨審明定擬恭摺具

奏仰祈

聖鑒事竊照奉新縣孀婦余劉氏遣夫弟余紹敏以
伊夫余紹寬自省回家路經新建縣地方被鄧
賢忠糾眾喝毆致斃鄧和之勾賄故出等情控
經都察院具奏奉

旨此案着交韓文綺督同臬司興科親提人證卷宗
秉公研訊明確按律定擬具奏抱告余紹敏該部
照例解往備質欽此並准遞解余紹敏到江經臣
查卷集訊鄧賢忠恃符狡展

奏請革審欽奉

上諭中書科中書鄧賢忠着卽斥革嚴行審訊按律
定擬具奏不准稍有枉縱等因欽此遵卽飭提人
證隔別嚴訊初猶扶同捏飾復經反復開導甫

據供出鄧賢忠之子鄧達湘與余紹寬賭博輸
錢余紹寬向索起衅被鄧賢忠與周金盛等共
毆致斃並緝獲餘人朱駝子等委員質明由司
解勘前來臣督同臬司鄭祖琛逐一研鞫緣鄧
賢忠籍隸新建縣捐納中書科中書分發行走
告病回籍雇周金盛在家傭工與奉新縣人余
紹寬素不認識余紹寬與弟余紹敏各在省城
店舖幫夥道光五年十一月初九日余紹寬攜

帶銀五兩錢一千文回家下午時分路遇新建
縣喬樂地方至熊德武茶店吃茶時鄧達湘並
鄧興才鄧世信鄧世華胡窮鬼熊德康及在逃
之鄧世萬先在店內閑坐向余紹寬問知姓名
一同坐談鄧興才起意擲骰賭博余紹寬與熊
德武等允從熊德武取出舊存骰子因店內來
往人多同至附近之閔希夷家許給頭錢向借
空屋擲賭有熊德垣挑賣點心走至在旁觀看

鄧達湘旋輸欠余紹寬錢四千文。央熊德武擔承與鄧世華先各走回。余紹寬同鄧興才等賭至夜間散場。閔希夷抽得頭錢一百六十文。余紹寬將攜帶銀錢輸完。尚欠鄧興才錢二千三百文。欲將鄧達湘欠錢作抵。鄧興才不允。將余紹寬衣服剥下。用繩細縛兩手。拉至熊德武店內。將衣服交店夥鄧興二官收存。令余紹寬還錢。取衣經鄧世信等解放。縛繩余紹寬。邀同鄧

世信鄧世萬胡窮鬼熊德康同往鄧賢忠家索討賭欠鄧賢忠以夜深無錢約俟次日償還余紹寬不依吵鬧鄧世信等與鄧賢忠工人周金盛並朱駝子解勸余紹寬一並辱罵鄧賢忠順取木梢毆傷余紹寬右臂膊左臂肱肘鄧世信用竹梢毆傷其左肩甲右胎膊右臂肱肘胸膛右右腰眼並兩脚面余紹寬接住竹梢拉奪朱駝子用石塊毆傷其右額角余紹寬兩脚亂踢

鄧世萬用木棒毆傷其兩膝連兩臙肘並左臂
腫脹跑開余紹寬拾石向擲周金盛攜取木擔
毆傷其左肋余紹寬用石撲打周金盛舉擔連
向嚇毆適傷其右後肋倒地經隣居職員鄧啟
桐及鄧世興等聞鬧先後出勸詎余紹寬傷重
旋即殞命鄧賢忠畏罪起意移屍令周金盛朱
駝子鄧世信鄧世萬胡窮鬼熊德康將屍擡放
鏹崗山下田內囑勿聲張各散十二日屍弟余

紹敏亦自省回知余紹寬尚未到家出外訪尋
走至熊德武店內向鄧興二官查問鄧興二官
恐說出賭博致令店主受累捏稱初九日有一
人不知何故被鄧興才等剥衣細縛至店經鄧
世信等解放走去並將余紹寬衣服給令認明
收回十四日有熊功之路遇見屍告知余紹敏
往看報經前任新建縣霍樹清驗明傳到鄧賢
忠鄧興才鄧世信鄧世華熊德垣鄧興二官鄧

啟桐等查訊鄧賢忠捏供余紹寬患瘋走失經
鄧興才等綑縛勸釋後又走入伊族隣鄧啟瑞
空門店樓伊疑賊喊捕跑走不知被何人致斃
並以供出實情均須問罪囑令鄧興才等一同
照供將周金盛藏匿在家不令赴案熊德垣因
霍樹清追問屍傷畏懼混認先用烟袋頭毆傷
余紹寬右額角據供通詳緝兇經臣暨臬司查
核供情支離批飭確訊屍妻余劉氏赴司暨臣

衙門呈控復飭研究鄧賢忠等堅供如前嗣因初二叅限滿先後詳經咨叅旋據該縣訪聞余紹寬係被鄧賢忠與周金盛等共毆致斃鄧賢忠訊不承認差緝周金盛等無獲無憑質定時鄧賢忠族叔鄧和之因與戲班爭論戲價被控曾信託已故縣差熊瑞調處情愿將價找給信內寫有需用若干字樣余劉氏聞知疑係賄囑書差舞弊脫兇一並列入詞內令夫弟余紹敏

赴京呈告經都察院具奏奉

旨解回審辦緝獲周金盛訊認擔毆余紹寬左肋右
後肋倒地身死周金盛旋在監病故鄧賢忠恃
符狡展奏奉

上諭革審究出前情各供不諱詰非預謀有心欲殺
亦無賄囑別情復加嚴究不特鄧賢忠等堅供
不移卽屍弟余紹敏等亦輸服無詞似無遁飾
查已死余紹寬被毆等傷惟最後被周金盛擔

毆致命右後肋為重應以周金盛擬抵周金盛
合依共毆人致死下手致命傷重者絞律擬絞
監候業於取供後病故應毋庸議已革中書鄧
賢忠因余紹寬向索伊子賄欠首先爭毆迨余
紹寬被伊工人周金盛等致傷身死並不即時
捕告將周金盛藏匿在家復令鄧興才等捏供
延案自應照例問擬鄧賢忠除在場共毆及起
意移屍罪止杖責卽主使證佐不言實情亦罪

止滿徒各輕罪不議外合依知人犯罪事發官
司差人追喚而藏匿在家不行捕告律於周金
盛死罪上減一等杖一百流三千里鄧興才始
則糾賭肇衅繼因余紹寬賭輸剥衣綑索致釀
人命情類兇惡鄧興才應照棍徒生事行兇無
故擾害良人擬軍例量減一等杖一百徒三年
熊德武出有賭具訊係舊存合依賭博不將造
賣之人供出即將出有賭具之人照販賣為從

例杖一百徒三年鄧世信同賭共毆移屍均罪
止枷杖其聽從鄧賢忠捏供應照證佐不言實
情律於滿徒上減一等杖九十徒二年半閔希
夷照偶然會聚開場窩賭抽頭無多例枷號三
個月杖一百鄧世華先雖到案不知致死人命
情由並非聽從捏供胡窮鬼熊德康聽從移屍
係屬輕罪不議應均與同賭之鄧達湘依賭博
不分兵民枷杖例各枷號兩個月杖一百朱駝

子依餘人律杖一百熊德垣說明先未毆打與
鄧興二官及聞鬧出勸先回之鄧啟桐亦均不
知毆斃人命惟到案不將賭博供出究有不合
應各照不應重律杖八十該犯等事犯到官在
道光八年十一月初九日

恩詔以前鄧賢忠逞兇刀狡似應不准援減第係職
官恭候

欽定鄧興才能德武鄧世信所得徒罪應各減為杖

一百閔希夷鄧世華熊德垣鄧興二官鄧啟桐
枷杖各罪均予援免鄧啟桐係屬職員並免收
贖胡窮鬼熊德康鄧達湘朱駝子俱到官在後
鄧達湘犯賭時年僅十五照律收贖餘俱分別
照擬枷責發落屍妻余劉氏所控伊夫被毆身
死業已得實餘控各情亦出有因應與訊無行
賄舞弊幫毆之鄧和之等及救阻不及之見證
鄧世興等均免置議無干省釋鄧興才等所贏

余紹寬銀錢及閔希夷抽得頭錢追出入官鄧
達湘所輸錢文係屬虛賑免其著追賭具骰子
並兇器據供丟棄均免查起逸犯鄧世萬飭緝
獲日另結鄧賢忠捐照追出另行咨銷鄧和之
被控另案因原告外出不到已照例註銷應毋
庸議此案前任新建縣霍樹清初審不實嗣已
自行訪出實情先後飭差丁役協同拏獲正從
各犯證究辦與始終未經察覺者不同應免置

議所有失察賭博又存留賭具各職名文職係
前任新建縣陞任南昌府同知霍樹清相應附
叅聽候部議武職職名查取另叅除全案供招
咨部外合將審擬緣由恭摺具

奏伏乞

皇上聖鑒勅部核覆施行奉

硃批刑部議奏

拏獲張貼揭帖恐嚇村民疏

奏為拏獲張貼揭帖恐嚇村民之會匪首從各犯
提省審辦先行恭摺具

奏仰祈

聖鑒事竊照南贛一帶向有會匪節經諄飭地方文
武各官隨時訪拏茲據贛南道薩興阿署南安
府朱楣上猶縣羅璋燦稟報訪聞上猶縣地方
有匪徒結會並匿名揭帖恐嚇居民之事先經

該縣羅璋燦訪獲鄒學洪黃世祥訊據供與在
逃之吳潮文等均入添弟會因黃世祥同藍曰
謨赴趙茂源店內賒酒不允爭鬧打毀什物被
街隣將藍曰謨細送中途脫逃嗣藍曰謨取出
揭帖底稿稱係吳潮文照會內流傳語句隨意
編寫令鄒學洪照謄盖用舊存模糊木戳央不
知情賣菜之黃潤生攷暗貼墟牆意在恐嚇村
民不敢再挈並無不法別情戳已聞挈燒燬並

據族隣細送黃潤生攷到案訊因素不識字被
誘張貼委非知情入會等供查揭帖所寫多係
添弟會內流傳俚語不成文理內有若煩惱了
我弟兄大惱光山不太平等句殊屬狂悖該署
府親詣查辦並經道鎮派委員弁會督嚴拏臣
接據稟報當卽飭司遴委南昌府同知霍樹清
坐補義寧州知州雷學淦馳往確查續據稟獲
藍曰謨吳潮文並曾瑞銓陳亞四卽陳文盛蕭

瑞郭文秀何烈萬李狗妹孜及曾瑞銓之子曾
兆元等研訊拜會情由與鄒學洪等所供大畧
相同惟編造揭帖吳潮文堅不承認與藍曰謨
鄒學洪等互相推賴餘犯或僅認拜師入會或
並不認拜會均稱不知編造揭帖情事先後搜
查各犯家內別無不法字跡及違禁器械犯已
卽時全獲居民照常安謐等情臣查該犯等均
係會匪膽敢張貼揭帖語涉狂悖顯有不法重

情夥黨亦斷不止此數仍嚴飭該地方文武及
委員再行密訪嚴拏毋使漏網獲犯已據該臬
司鄭祖琛稟經提省並委員弁迎提除俟解到
澈底嚴切根究實係何人起意編造揭帖如何
拜會實有同夥若干分別首從盡法懲辦勿任
稍有隱飾外合先恭摺奏

聞伏乞

皇上聖鑒奉

殊批另有旨

勘定石圍山疏

奏為勘審定擬恭摺仰祈

聖鑒事竊准軍機大臣字寄奉

上諭御史王贈芳奏江西宜春縣石圍山間有銅鉛砂苗奸民妄思開採前經封禁今聞有上高縣生員陳泰來於上年八月赴提督衙門具呈開礦批咨江西巡撫查復陳泰來回至江省輒敢以京控批准為名議定股分開採銀礦各府屬有受其愚

弄捐貲入股者自數百至數千兩等語奸民牟利惑眾竄為地方之害該縣石圍山本經封禁豈可任其復行開採着蔣攸銛韓文綺迅飭該府縣嚴查禁止陳泰來赴京具控指稱批准是否實有其事並現在曾否聚眾開挖着查明據實具奏至該御史奏稱萍鄉縣有葉絲冲山亦有礦苗着一並飭屬嚴切查禁勿許偷採等因欽此查上高縣廩生陳泰來先於道光七年以宜春縣登佈裏山

產有礦苗赴臣蔣攸銛衙門呈請開採當經批飭並咨會臣韓文綺查明封禁陳泰來復於上年呈經步軍統領衙門咨江勘辦業已委員勘無鉛礦透露且附近多有民房田畝則不准報採照舊封禁正在會議巡防事宜欽奉

諭旨飭查禁止經臣韓文綺當將業經封禁緣由先行覆

奏在案臣等以陳泰來迭次具呈開礦必有藉端

惑衆愚弄捐貲情事飭提陳泰來等來省訊究
一面遴委瑞州府銅鼓營同知文炳前詣萍鄉
會同該府縣勘明葉絲沖山卽葉絲坑山曾於
嘉慶二十五年縣民楊毓瑞等偷挖礦土訪拏
解省訊擬封禁現在查無鉛苗透露偷採情事
繪圖稟覆並據南昌府知府李本榆等提訊陳
泰來據供宜春縣登佈裏山係已故譚肇賢原
買之業轉賣與林森經伊給錢合管因山內產

有礦苗譚肇賢林森與伊先後在本省呈請開採歷勘封禁伊圖試採漁利是以赴京呈請因恐不能聳准捏砌府縣勘無妨碍等語至伊僅向親友金錦輝劉訥吉羅作棟先後共借銀七百三十兩為進京盤費安家等項之用均有借約京控回江後並沒指稱批准議定股分愚弄人捐貲的事林森同羅作棟等均不知情等供詰訊羅作棟等吊驗借約賬簿均屬相符並以

如有被其愚弄捐貲入股者許卽首明准其免
罪追銀給領出示招告亦無舉首之人所供似
屬可信照律議擬由兼署藩司按察使鄭祖琛
核詳請

奏前來臣等查陳泰來雖據究無愚弄捐貲入股
惑衆情事但屢請試採封禁山場已屬不守卧
碑乃將原勘有碍民居田廬之山捏作勘無妨
碍殊屬呈控失實陳泰來應斥革廩生照申訴

不實律杖一百事犯到官在道光八年十一月初九日

恩詔以前應請援免仍革去廩生不准開復生員林森同借銀之羅作棟等均不知陳泰來京控情事應免置議陳泰來借欠各銀飭令自行清理宜春縣所轄登佈裏及毘連之松樹壁韓婆坵棚卜裏等山並萍鄉縣管轄之葉絲坑山概行永遠封禁不准開採登佈裏山原建卡房二間

足資棲息應由縣府及黃圃司巡檢太平關外
委各派兵役二名葉絲坑山原建卡房一間恐
難周密應添建一間亦由縣府並安樂司巡檢
萍鄉營把總各派兵役二名分駐各卡晝夜防
守由縣府捐給飯食按月更替責成各巡檢暨
外委把總就近隨時巡察仍由各該縣按旬親
歷周巡並令本管之袁州府及袁臨協副將每
月輪查結報如有匪徒偷竄情弊立即嚴拏照

例懲辦似此嚴定章程庶奸民無從覬覦地方
益增靜謐是否有當合將臣等會議緣由謹合
詞恭摺具

奏伏乞

皇上聖鑒訓示施行

籌議緝匪章程疏

奏為籌議緝匪章程恭摺仰祈

聖鑒事竊臣等接准部咨欽奉

上諭御史王贈芳奏會匪鹽梟蔓延滋害請飭捕勦
一摺會匪鹽梟竄為地方之害據該御史奏江西
吉安府屬泰和萬安等縣向為私梟出沒之所加
以會匪繁多與私梟合而為一或名添弟會或名
添刀會又稱千刀會均自南贛延入吉安其初猶

知畏法近來黨羽日多地方官懼滋事端惟思苟
且調停卽釀成巨案猶復一味姑息草率了結甚
有鄉勇挈獲送官之匪徒仍從寬免縱之歸家似
此選懦因循化大為小不過規避處分而縱匪養
奸為害日深必應明定考成以靖地方而安良善
着蔣攸銹韓文綺通飭所屬各就地面嚴密跣緝
遇有此項匪徒立即弋獲明正典刑毋稍輕縱沿
河添設巡船專捕劫盜盡法處治其實由挾制入

會者取具族隣切結准其自首若能縛送積惡首
匪仍予重賞其匪徒繁多之處責成明練有為之
員撫勦兼施毋許稍有諱飾如果實力奉行地方
肅清舊任准免處分新任卽予擢遷倘有仍前將
就了事者立卽嚴行叅奏加等懲處不稍寬貸欽
此仰見

聖明訓示精詳務使閭閻綏靖之至意臣等遵卽恭
錄行司轉行各屬一體欽遵伏查江西南贛一

帶界連閩粵向多會匪延入吉安府屬之萬安等縣名為添弟會又名三點會其中帶有刀械者民間卽指為添刀千刀會名並非該犯等自立名目萬安泰和二縣為粵私從入門戶每有闖卡拒捕之案多已入鹽並獲內獲鹽不獲人者身雖倖脫貲已蕩然因而流入匪黨亦所不免節次飭拏懲辦總未能盡絕根株前於道光六年御史熊遇泰奏查江西會匪案內經臣韓

文綺議設族正協同保甲據實舉報

奏明在案自六年冬間至今獲辦會匪鹽販及沿河搶劫之案共計二百餘犯分別問擬斬絞流徒先後題奏咨結緝獲私鹽亦不下百萬餘其鄉民獲送之犯訊明為匪確實者悉已照例問擬內有無辜牽累者均係訊取族隣切實保結始行省釋現復分委幹員馳赴各該處明查暗訪尚無梟匪勾結及化大為小輕縱不辦之案

當經通飭各屬文武嚴密跣緝認真巡防弗任
稍有疎縱惟戢匪務期淨盡立法尤貴周詳臣
等往返札商並據兩司議詳前設族正獲犯多
由舉發業已漸有成效每年向有編查保甲之
法如果實力奉行匪徒無從藏匿惟有責成該
州縣督率族正人等按月逐一稽查填註門牌
並令該管道府等不時抽驗戶口一清良奸立
辨如有會匪私販等項卽時查獲按法重懲地

方官或有懈怠及諱飾情事嚴叅辦理再於往來大路及沿河地面添派弁兵周流巡捕臣等復剴切曉示宣布

皇仁被誘者准其自首縛送者加予重賞查辦出力之員分別免議遷擢凡在官民當莫不各發天良地方日臻靜謐至通省河道上年

奏准添設巡船四十隻足資巡防似可毋庸再添惟購線訪拏獲犯犒賞動需經費原議章程籌

欵尚屬不敷自應量為裒益加以分捐津貼以期經久容另飭司妥議核辦臣等受

恩深重似此匪徒擾害之事於地方大有關係必當隨時實力整頓斷不敢稍任玩忽自蹈重咎所有臣等會議緣由謹合詞恭摺具

奏伏乞

皇上聖鑒

列傳

韓文綺浙江仁和人乾隆六十年進士以部屬用籤分刑部嘉慶二年補主事三年充順天鄉試同考官五年丁父憂八年服闋補原官九年升員外郎十年充會試同考官旋升郎中十一年丁母憂十四年服闋補原官十五年

京察一等

記名以府道用十七年授直隸永平府知府十九年升

清河道二十年八月

上幸木蘭以

蹕路未能經理妥協下部議處十二月查拏灤州教匪

王殿魁等文綺首先獲犯

上嘉其緝捕勤能

賞戴花翎二十一年署按察使二十二年二月授廣東

按察使九月調貴州按察使十一月調四川按

察使二十五年三月升江西布政使六月擢刑

部右侍郎十一月充武

殿試讀卷官十二月轉左侍郎道光元年三月因
審辦德勝門城上失落木植未能究出實情下
部議處部議降三級調用

上加恩改為畱任二年閏三月充

殿試讀卷官八月充順天鄉試副考官九月授江
蘇巡撫十一月偕兩江總督孫玉庭奏揚州府
所轄瓜州河道亟應疏濬深通估需工料銀二

卷十二
三
萬二千餘兩在藩庫籌款動撥得

旨果於水利民生有益何吝多金總在認真經理也
勉之三年三月奏兌運蘇松等屬幫船請掣定
章次輪流受兌以除積弊又審擬民人柏喬治
控修撰洪瑩買有夫之女為妾一案鞫實褫洪
瑩職並請將先後提審未能究出實情之甘泉
縣知縣陳文述揚州府知府黃在厚交部議處
均

從之五月奏清理徐州駱馬湖官民灘地分別蓄草
收租得

旨允行七月奏核鹽道廖均未經更事請改補京職
上以廖均質性輕浮

命勒令休致先是淮商鄭同瑞京控總商黃灤泰侵
欺庫款

詔文綺嚴密訪查弗令朦混十一月奏黃灤泰別無
罪狀但疊被散商訐控究係衆論不孚應請革

退總商作為散商隨同辦運

從之又奏清河縣水陸衝途請裁淮安府檢校另於
清河濶橋置巡檢一員就近稽查如所請行四
年二月奏請許揚兩關卹商除弊及賠補虧短
章程一委員宜慎重簡派一家丁宜按名覈實
一漏罰宜遵守成例一查稅宜嚴杜羈措一漕
船宜嚴禁夾帶至賠補虧短許關應照新例按
各任月日接筭賠繳揚關經徵月分衰旺不同

應以月分之衰旺計成數之多寡於賠繳之中
仍寓體卹之意疏入

允之七月奏江蘇倉庫虧墊酌議追補及防杜續虧
章程一墊還民欠宜分單勒限催追一本省外
省官員分別勒限追補一本省外省追賠銀兩
應酌展限期完繳一領變銀款應勒限追補一
攤捐銀款應分別流攤追補一書役欠項應分
限嚴追歸欸一無着銀兩應仍提羨餘彌補一

存倉米穀宜勒限買補足額下部議行閏七月
以刑部侍郎任內擬流官犯候際清呈請贖罪
漏查紅供並失察官吏得贓降二級調用又以
前任刑部濫保司員德恩等部議降二級調用
上改為補官日降三級畱任九月補山東按察使五
年二月升四川布政使七月調雲南布政使九
月授江西巡撫六年奏被水之蓮花萍鄉永新
宜春安福廬陵分宜等七廳縣應請撫卹並緩

其賦悉如所請行先是御史熊遇泰奏江西南
安贛州一帶鹽梟會匪肆行無忌

上命文綺逐加訪查毋稍疎縱至是奏請將首惡嚴
辦示懲選舉族正鄉耆查明勤惰分別獎勵斥
革復於衝要處所移駐專閫大員以資彈壓得
旨總要認真查辦勿蹈模稜徇庇之習戒之勉之七
年奏宜黃樂安二縣陸卡請移設峽江縣龍母
廟地方由贛州鎮遴委都司一員兵五十名另

委佐雜一員帶役八名會同堵緝至萬安縣芙蓉門為粵私侵入門戶馬家洲為私販囤積之所現於芙蓉門之上游添設一卡並於馬家洲另設卡隘以期梟徒無從囤積

從之八年正月以江西學政福申失察家人蕭三恣橫藐法褫福申職文綺以近在同城不能畱心查察部議降二級畱任四月奏南贛等府匪徒出沒請動支間欸設巡船四十隻上下梭巡較

為周密得

旨允行九年十月授都察院左副都御史十年以前
在江西巡撫任內督催地丁錢糧不力部議降
三級調用

諭曰因公處分原可改為畱任惟韓文綺前在江西
巡撫任內並不力加整頓以致會匪日益增多地
方廢弛著實降一級調用十二年七月以署直隸
按察司任內失察新河縣民人尹老須倡立邪

教降二級畱任十六年十月因病請假調理二十一年卒子倬章現官江蘇候補知縣孫泰華現官戶部員外郎

皇清誥授資政大夫晉封光祿大夫都察院左副都御史前刑部左侍郎加二級仁和韓公墓志銘

賜進士出身光祿大夫 太子太保 予告體仁閣

大學士儀徵阮元撰

賜進士出身朝議大夫 日講 起居注官翰林院

侍講學士 南書房行走錢塘戴熙書

賜進士出身奉直大夫 日講 起居注官翰林院

侍讀 上書房行走武進丁嘉葆篆蓋

公諱文綺字蔚林號三橋其先系出河陽韓氏宋南
渡始遷浙中今為杭之仁和人曾祖諱昌時祖諱灝
考諱松代有潛德皆以公貴累贈至光祿大夫曾
祖妣氏朱祖妣氏張生祖妣氏陳妣氏沈皆贈一
品夫人公於兄弟行居長髫齡穎異能文以高材生
舉乾隆丙午鄉試第一癸丑會試既中式疾作至乙
卯歲補應殿試成進士授刑部主事升郎中充嘉
慶戊午順天鄉試乙丑會試同考官十七年出知直

隸永平府十九年擢清河道以捕林清餘黨功

賞戴花翎兼署按察使未幾升廣東按察使調貴州
旋調四川二十五年遷江西布政使未至道拜刑部
右侍郎道光元年轉左侍郎二年充貢士覆試閱卷
官 殿試讀卷官順天鄉試副考官復出巡撫江蘇
四年因官刑部時贖罪案降調尋授山東按察使五
年遷四川布政使調雲南未行卽

命巡撫江西兼提督九年

召為都察院左副都御史復以催科處分議降調
特旨以三品京堂候補久之以疾請退就養居京邸
二十一年夏四月十有三日卒春秋七十有八公恂
恂仁厚少日以孝友稱愛人濟物本於天性起家刑
曹力矢矜慎務得情法之平官提牢時親製藥餌夫
人手縫棉衣以昇罪囚屢隨

命使讞案直隸山東威勤伯勒保公督江南復隨往
既請為監司矣司寇以廉能請留厥後自川藩入貳

秋官

仁宗睿皇帝嘉川省秋讞減少為公慎重刑名所致其以明允受

先帝知如此當守永平時值林逆之變初定賊供詞稱喜峰口有伏寇公家至而戶察之以無餘孽告良善獲全其任清河供軍糈甚勞且捕獲教首王殿奎等五人置重典畿輔肅然褒賜遷擢實基於此顧公當時不樂以為功居常道及尚心惻云其撫蘇也

會大水拯救四十七州廳縣衛蓄民至廢寢食動帑
百餘萬又多方勸募周卹招徠泛舟之粟全活甚衆
水退與浙撫帥公承瀛會籌江浙水利先濬澱泖次
疏吳淞舉臬使林公則徐綜其事後乃次第導達山
陽之澗河阜寧之救生河瓜洲之內河河渠大治他
若寬積逋以恤吏察誣訟以恤商省勘轉以恤有罪
公之仁吾江鄉者不勝紀焉洎移節江西恤民瘼者
一如撫吳於沙井復古渡章貢上下置巡哨船南贛

染粵俗好結盟帶刀吉安又為粵醴私販所從入多
抗捕鋤治不能盡心閔焉於是率行教化議立族正
以濟保伍之法使姦宄有所戒畏江西人咸謂公長
者犯者鮮少然時論或疑其尚寬惟

上深知其得民持大體改官臺憲固將資以保元氣
植紀綱乃因催科薄懲左遷引疾竟不復起仁人之
亡天下有心者交惜之夫人同里沈氏湖北鹽法道
諱榮勲女先佐其孝養後贊其慈仁年僅五十有九

卒於嘉慶二十五年公嘗以失賢助為憾距今公卒二十一年矣公喪歸將以二十三年秋七月初五日合窆於小和山之麓子二人倬章吳江知縣綬章嘉慶戊辰舉人八旗官學教習候選知縣前卒孫三人日華二品廕生工部主事前卒泰華戶部員外郎昭華國學生曾孫二人國保國楨女三人國子監助教許兆奎內閣中書張應昌內閣侍讀吳清皋其婿也孫女四人曾孫女二人倬章扶護過邗上以狀來乞

銘元與公鄉舉同歲且有連知公最深銘公宜莫如
余公之行道於世者其大端略敘之足以傳矣推解
小節可不著也為之銘曰

中心安仁伊古所稀誰謂皋蘇其性刻谿汪汪遺澤
江南東西惜早退閒而未竟厥施斯人莫邁其德可
思世有仁人庶知予悲

右恭壽堂奏議十二卷仁和韓三橋先生文綺撰
皆其巡撫江蘇江西時疏稿惜其本已遭鼠嚼首
尾亦殘缺不完按之約少文十餘篇不全者五篇
因無別本末由抄錄惟其神道碑四頁從金亞伯
應麟寄華堂文鈔錄入四卷五卷十卷十二卷之
目亦按文錄冠其首重為修訂置之案頭先生之
政蹟文章胥於是乎在光緒庚寅季秋朔日海甯
後學鄒存淦儼筆氏識